

清史列傳

第一函  
第八冊

清史列傳 卷八

大臣畫一傳檔正編五

王熙

王熙順天宛平人父崇簡明崇禎進士戶部觀政世祖章皇帝順治三年以順天學政曹溶薦補選庶吉士授檢討洊遷侍讀祭酒侍讀學士少詹事學士吏部侍郎禮部尚書加太子太保嘗疏請賜卹明季殉難諸臣范景文蔡懋德等二十八人又議定帝王諡典罷宋臣潘美張浚從祀議北岳恆山舊立廟曲陽非是當移祀渾源州皆從之十八年以疾解任康熙十七年卒諡文貞熙由順治四年進士改庶吉士授檢討十年二月上親試曾習國書翰林熙列次等諭令勉力學習尋遷司業中允洗馬諭德會初設日講官以熙同學士麻勒吉胡兆龍等充之命每日直講十三年轉庶子遷侍講學士十四年七月擢弘文院學士上曰父子同官古今所少以爾誠恪特加此恩九月充經筵講官十五年教習庶吉士充武會試正考官擢禮部右侍郎兼翰林院掌院學士十七年六月上命造直房景運門內

熙與諸翰林分班直宿十一月考滿加禮部尙書十八年聖祖仁皇帝御極復內三院舊制熙改兼弘文院學士尋轉禮部左侍郎康熙三年以失察欠糧舉人入場削尙書銜降一級留任五十年十一月擢左都御史十二月疏言藩臬兩司總理錢穀刑名守巡各道分蒞各府州縣職任綦重其貪穢暴酷者固爲民害卽闕宓衰庸病廢者亦足貽誤地方乃近來督撫因其地近情親彌縫便巧互相容隱糾劾無聞請敕部嚴定徇庇處分尋得旨如所請行六年疏言六部滿洲員外郎主事與郎中一體辦事乃漢官則以一司之事專委之郎中其員外與主事不過積俸待遷自後應照滿官例各勤職業其不辦事者卽行劾罷今各省關倉抽分造船等事已歸有司管理停遣部員其戶部漢主事二十八員工部漢主事二十員當酌議省減在京六衛管徵錢糧二千餘兩設守備千總等官三十六員實爲閒冗亦宜裁併疏下部議員外郎主事令與郎中同辦事裁戶工二部主事十七員千總六員又疏言近例招民百家送至盛京優授知縣恐有不肖奸民借資爲市貽害地方宜改授散秩以絕僥倖又現任官員捐助銀米博取議敘每云設法捐輸夫設法之中何可究詰名出私橐實則取自民間請一切停罷並從之又疏

言八旗官學教習向以恩拔歲副貢生考取近因人少參用納粟監生不皆文理優長請改令舉人預考禮部會同監臣嚴加考選並分派博士助教等官時至官學稽查教習勤惰及諸生學業課程得旨國子監作養人才教習宜嚴加考試選用文理優長之人復派員赴官學稽查勤惰下所司詳議行是時平西王吳三桂駐雲南平南王尚可喜駐廣東靖南王耿精忠駐福建擁兵踰制三桂驕縱尤甚熙疏言直省錢糧大半耗於雲貴閩廣之兵餉就雲貴言藩下官兵歲需俸餉三百餘萬本省賦役不足供什一勢難經久臣愚以爲滇黔已平綠旗額兵亟宜汰減卽藩下餘丁亦宜散遣屯種則勢分而餉亦裕下部議令平西王與督撫提鎮酌籌裁汰熙又疏言閩廣江西湖廣等省官員自置貨物售之所屬兵民或指稱藩下挾勢橫行放債取利省會要區徧置官商占踞盤剝致小民以貿易爲生者顛連失業請敕部詳議王公將軍督撫提鎮大小官員如有持己資與民爭利及奸商借藩下勢橫行者嚴加治罪旨下部申嚴禁例七年五月疏言近因天氣亢旱金星晝見詔臣工指陳闕失伏念世祖章皇帝精勤圖治諸曹政務皆經詳定數年來有因言官條奏改易者有因各部院題請更張者有會議興革者則例繁



多官吏奉行得以任意輕重乞敕所司詳察現行事例因變法而滋弊者具題改  
遵舊典其近年新例實有便於今日者亦條晰不得不然之故統候睿裁定奪畫  
一永遵上命各部院如所請條議於是鄉會試仍用八股文又前此都統內大臣  
閣部以下官儀衛踰制修築黃河工程不立限期刑部獄囚霜降後未經依律朝  
審至是改遵舊制其繁例就刪者復數十事八月疏言逃人誑稱寄頓財物稟部  
行提致累無辜請敕部察明原案有無財物不得遽准勾取至窩逃之人物故其  
妻子請免流徙下部議行九月遷工部尙書十二年五月調兵部尙書十三年三  
月疏言逆賊吳三桂負恩反叛肆虐滇黔毒流蜀楚散布僞筭煽惑人心今大兵  
已抵荆南元惡旦夕授首逆子吳應熊素憑勢位擅利散財蓄養亡命種種流言  
譏傳不止大寇在外大慙在內不早爲果斷貽患匪輕且大逆不道不限籍之同  
異律皆處斬討平三桂之後脅從者或邀恩宥而首惡必無可寬應熊之當誅戮  
無待再計決者宜速正典刑傳首湖南四川老賊聞之必且魂迷意亂氣沮神昏  
羣賊聞之內失所援自然解體卽兵士百姓聞之公義所激勇氣自倍至應熊親  
隨人等已發禁刑部人衆則難防時久則易玩宜卽敕法司訊別情罪重者立決

次者分給各旗消除內變之根源掃蕩逆賊之隱禍務莫急於此上命王貝勒大臣覈議事詳三桂傳十四年詔部院堂官各舉堪勝司道者熙疏薦原任御史郝浴候補司道鄭端周體觀尋詔舉博學鴻儒疏薦原任推官尤侗中書汪懋麟皆次第錄用十七年十二月丁父憂二十一年五月授保和殿大學士兼禮部尙書二十五年重修太祖高皇帝實錄告成加太子太傅時編纂三朝聖訓政治典訓暨平定三逆方略大清會典一統志明史並充總裁官二十七年二月給事中高層雲疏言頃見王大臣會議典禮於永康左門大學士王熙余國柱李之芳向康親王傑書等跪語移時伏思天潢貴裔王大臣禮宜致敬獨公同議事天威式臨非大臣跪諸王之地亦非諸王受跪之時請敕部申飭諭曰朕召大臣議事如時久每賜墊坐語大臣與諸王會議公事不必向諸王行跪傑書王熙等俱從寬免議是月充會試正考官三十一年以足疾請解任奉旨卿自世祖章皇帝時簡侍禁廷恪恭盡職朕屢加擢用漸進綸扉夙夜殫心勤勞自勵今舊臣凋謝惟卿獨在班列雖精力就衰而老成練達常侍左右殊有裨益其勉自調攝照舊供職不必求罷嗣屢疏乞休四十年八月允致仕晉少傅明年四月特遣侍衛五格賚賜

清史 列傳  
耆老舊德匾額及對幅傳諭曰卿歷官最久自去歲告病在家無日不念老臣也  
近日九卿皆求匾額字對想卿身雖在告心未嘗一時不在朝中故特書以賜卿  
其勉強餐食輔以醫藥慰朕不忘舊臣之至意四十二年正月卒於家年七十有  
六命直郡王允禔大學士馬齊侍衛海青馮武奠茶酒時上南巡傳諭直郡王曰  
前此大臣病逝間有命皇子臨其喪者從未施拜奠之禮大學士王熙因係世祖  
章皇帝舊臣特令王行禮舉哀致奠賜祭葬如典禮諡文靖五十年四月上追念  
數十年中諸大臣諭及王熙服官最久盡力矢忠保全名節云世宗憲皇帝雍正  
八年入祀賢良祠

### 魏象樞

魏象樞山西蔚州人明崇禎舉人本朝順治三年進士選庶吉士明年改授刑科  
給事中以明季大弊未禁革者督撫按聽用之官舍太雜道府州縣之胥隸太濫  
疏請清理報可五年轉工科右給事中尋轉刑科左給事中劾安徽巡撫王懷徇  
庇受賄罷之八年世祖章皇帝初親政詔免天下額賦罷城工除加派其時有司  
有以私徵侵帑坐罪者因上疏極陳其弊請飭州縣各依易知單造格眼冊註明

人戶姓名糧銀款目及蠲賑各清數呈大吏覈驗印發開徵又請定藩司會計之法以杜欺隱立內外各官治事之限以清稽滯皆報可九年轉吏科給事中十年會大計連上四疏皆言計典其一言糾拾之舊制宜復言官不宜反坐下所司議著爲令因奏白順治四年糾拾被譴吏科左給事中劉榘寃得旨復職是年以九卿科道會議總兵官任珍落職怨望罪大學士陳名夏等漢官二十八人爲一議議科臣坐徇黨負恩罪應流有旨釋免各予降罰留原任象樞供職如故明年大學士寧完我疏列陳名夏罪狀詞連象樞初象樞誤劾司官錢受祺擅委中軍下部議降級名夏票改罰俸至是謂象樞與名夏子婦家山西牛射斗爲媼親名夏用是黨護及逮問象樞素不識射斗遂免議旋以名夏父子濟惡言官不先事舉發六科之長皆鐫秩一級象樞降補詹事府主簿累遷光祿寺丞十六年以母老請終養康熙十一年母憂服除用大學士馮溥薦授貴州道監察御史滿歲晉四品卿銜仍掌御史事屢有陳奏大要謂先教化則宜崇臣僚之家教亟治河則定蓄任使之人才正人心則宜戒淫巧勵天下則宜輯禮書聖祖皆是其言是年冬擢都察院左僉都御史明年二月遷順天府尹四月轉大理寺卿七月擢戶部右



侍郎十二月轉左侍郎會西南用兵上籌餉三疏其略曰確估價值以清浮冒嚴覈關稅以防侵漁慎用藩司以清錢糧從之尋命同侍郎班迪清理部庫十七年授都察院左都御史首疏申明憲綱十事聖祖嘉其切中時弊時嘉定縣知縣陸隴其有清名以盜案開報職名遲延革職象樞疏舉之鎮江府知府劉鼎溺職已極而報陞糧道絳州知州曹廷兪劣跡顯著而不被糾察象樞疏劾之又以磨勘順天鄉試卷陳科場八弊請設內簾監試御史以重關防陳學政十弊請據爲三年考覈之實廷議並著爲令明年遷刑部尙書疏請留御史臺爲朝廷整肅綱紀上可其奏以刑部尙書銜留任遵諭舉廉吏疏薦原任侍郎高珩達哈塔雷虎班迪大理卿瑚密色侍讀蕭維豫郎中文運布政使畢振姬知縣陸隴其張沐十人皆得旨錄用十九年任刑部尙書尋命同吏部侍郎科爾坤巡察畿輔稱旨二十三年以病乞休許之賜御書寒松堂額寵其歸著有寒松堂集二十六年卒於家年七十有一賜祭葬如典禮諡敏果雍正八年入祀賢良祠

湯斌

湯斌河南睢州人母趙氏明末流賊陷州城殉節死父祖契攜斌避兵流寓浙江

衢州世祖章皇帝順治二年大兵定江南江西斌隨其父還里九年舉進士由庶吉士授國史院檢討十二年二月應詔陳言請廣搜野乘遺書以修明史且言宋史修於元至正特傳文天祥之忠元史修於明洪武亦著巴顏布哈之義我朝順治元二年間前明諸臣亦有抗節不屈臨危致命者與叛逆不同宜令纂修諸臣勿事瞻顧昭示綱常於萬世下所司大學士馮銓金之俊等謂斌誇獎抗逆之人擬旨嚴飭世祖特詔斌至南苑溫諭移時九月諭吏部曰翰林官員讀書中祕習知法度自能以學問爲經濟助登上理茲朕親行裁定十八員皆品行清端才猷膽裕各照外轉應得職銜陞一級用於是斌爲陝西潼關兵備道十六年調江西嶺北道甫至任流賊鄭成功犯江寧陰遣賊黨至贛州流言煽誘僞通海侯李玉廷踞零都山寨詐約降實伺南安無備謀陷城斌廉得成功奸細白巡撫蘇宏祖斬之又請移兵守南安玉廷果來犯見有備卻走游擊洪起元追逐數月乃就擒斌以父老乞休歸里尋丁憂旣服闋聞容城孫奇逢講學夏峯往受其業聖祖仁皇帝康熙十七年詔舉博學鴻儒尙書魏象樞薦斌學有淵源躬行實踐副都御史金鉉薦斌文詞淹雅品行端醇召試一等授翰林院侍講同編修彭孫適等纂

修明史二十年充日講起居注官浙江鄉試正考官轉侍讀明年爲明史總裁官並纂修太宗文皇帝世祖章皇帝聖訓遷左春坊左庶子二十三年二月擢內閣學士充大清會典副總裁官時江寧巡撫余國柱內遷左都御史調湖廣巡撫王新命代之新命旋遷兩江總督六月九卿等會推學士孫在豐浙江布政使石琳堪任江寧巡撫上諭大學士曰所貴道學者在身體力行見諸實事非徒託之空言今有道學名者甚多考其究竟言行皆悖朕聞學士湯斌曾與孫奇逢講明道學頗有定行前典試浙江操守甚善可補援江寧巡撫斌瀕行上諭曰以爾久侍講筵老成端謹江蘇爲東南重地故特簡用居官以正風俗爲先江蘇風俗奢侈浮華爾其加意化導移風易俗非旦夕事從容漸摩使之改心易慮當有成效錢糧歷年不清督撫所奏錢穀刑名大事多有舛錯爾能潔己率屬自然改觀賜御書三鞍馬一表裏十銀五百兩十月上南巡至蘇州諭斌曰向聞吳閭繁盛今觀其風土大略尙虛華安佚樂逐末者多力田者寡遂至家鮮蓋藏人情澆薄爾當使之去奢返樸事事務本庶幾家給人足可挽頽風朕欲周知地方風俗小民生計有事巡行凡日用所需皆自內府儲備秋毫不取之民間恐不肖官吏借端妄

派以致擾民爾其嚴察劾奏駕至江寧諭斌回署治事賜御書及狐腋蟒服初余國柱任巡撫奏言淮揚二府屬水淹涸出者令次年徵輸額賦至是斌以遣員履勘仍然水淹卽涸出者亦未耕種奏入部議令再勘斌仍以實奏事乃寢二十四年四月疏言蘇松等府賦額繁重康熙十八年以來積逋若同時並徵民力不能兼完知縣催科幾敲撲不輟請於二十四年起分年帶徵俾官無挪新補舊之弊民無廢棄農桑之苦疏下部議行是年秋淮揚徐三府復水斌條列蠲賑事宜以聞請發帑五萬兩糴米湖廣先借所屬知縣倉穀散給又言災地百姓餬口無資恐入冬飢寒兼迫流亡者多臣與漕臣徐旭齡河臣靳輔定議二臣就近分董淮安賑務臣卽至清河桃源宿遷邳豐諸州縣察賑上命戶部侍郎素赫往助督賑俾災民咸就撫輯斌先後奏劾蘇州知府趙祿星揚州知府張萬壽句容知縣陳協濬宜興知縣蔡司霑如臯知縣盧繩睢寧知縣葛之英江都知縣劉濤金壇知縣劉茂位等貪酷劣蹟並褫革勘治常州知府祖進朝以失察屬吏降調斌奏留之部議不准得旨祖進朝既經巡撫湯斌保奏清廉可從所請仍留原任以勸廉吏時吏部行取知縣爲御史斌疏言行取定例必錢糧胥完而蘇州松江二府賦



重役繁甲於天下銓選得此輒謂遷擢難期頽然自放或竟罔顧官箴臣受任巡撫首以察吏安民爲念徧告屬員聖上知人之明出自天授苟能潔己愛民決不至久沈下位故一時守令爭自濯磨操守廉潔政績表著者實不乏人然錢糧則萬萬不能十分全完蓋勢處其難智勇才力俱困今若拘成例勢必以僻壤小邑易於藏拙者塞責未足以光鉅典惟吳縣知縣劉滋吳江知縣郭琇廉能最著乞俯准行取以勵循良俾繁劇與兩邑相符者亦知有登進階相率奮勉疏下部議以二員俱有錢糧未完案格於例得旨劉滋郭琇湯斌旣稱爲廉能最著准其行取二十五年三月斌疏言吳中風俗尙氣節重文章而佻巧者每作淫詞艷曲壞人心術蚩愚之民斂財聚會迎神賽社一旛之值至數百金婦女有遊冶之習靚妝艷服連袂寺院無賴少年習學拳勇輕生好鬪名爲打降臣嚴加訓飭委曲告誡一年以來寺院無婦女之遊迎神罷會豔曲絕編打降斂迹惟妖邪巫覡習爲怪誕之說愚民爲其所惑牢不可破蘇州府城西上方山有五通淫祠幾數百年遠近之人奔走如鶩牲牢酒醴之饗歌舞笙簧之聲無時間歇諺謂其山曰肉山其下石湖曰酒海凡少年婦女有寒熱症者巫覡輒曰五通將娶爲婦病者神魂

失據往往羸瘵而死每歲常至數十家視河伯娶婦爲更甚臣多方禁之其風稍息比因臣勘災至淮乘隙益肆猖獗臣遂收妖像木偶付之烈焰土偶投之深淵檄行有司類此者盡撤燬之其材備修學宮葺城垣之用民始而駭以爲從前曾有官長銳意革除旋即遇崇而死皆爲臣危之數月之後見無他異始大悟往日之非然吳中巫覡最黠且悍恐臣去任後又造怪誕之說箕斂貲財更議興復請賜特旨嚴禁勒石山巔庶可永絕根株疏上得旨淫祠惑衆誣民有關風化如所請勒石嚴禁直隸及各省有似此者一體飭遵先是廷臣有言輔導皇太子之任非斌不可者於是上諭吏部曰自古帝王諭教太子必簡和平謹恪之臣統領宮僚專資贊導江寧巡撫湯斌在講筵時素行謹慎朕所稔知及簡任巡撫以來潔己率屬實心任事允宜拔擢大用風示有位特授爲禮部尙書管詹事府事閏四月斌至諭曰天下官有才者不少操守清廉者不多見爾前陞辭時言平日不敢自欺今在江蘇克踐前言朕用嘉悅故行超擢爾其勉之初河臣靳輔與按察使于成龍論河工事久未決命尙書薩穆哈穆成額往會斌勘議斌謂宜濬高郵寶應諸州縣下河俾積水漸歸於海開一尺有一尺之益開一丈有一丈之益薩穆

哈等因靳輔欲於下河築隄束水入海還奏開濬無益至是上詢斌斌以前議對上詰問薩穆哈穆成額各語塞遂褫其職特遣侍郎孫在豐督濬下河如斌議尋充經筵講官時始設太子講官以斌與詹事尹泰郭棻少詹事舒淑中允閻世繩贊善黃與堅充之斌疏薦候補道耿介賦質剛方踐履篤實潛心經傳學有淵源雖年逾六旬精力尙健乞徵取引見以備錄用上遂授介爲少詹事命斌與介輔導太子二十六年五月因不雨詔臣工直言得失靈臺郎董漢臣以諭教元良愼簡宰執奏御史陶式玉劾漢臣撫拾浮泛之事誇大其詞欺世盜名請逮繫嚴鞠疏下內閣集九卿議有欲重罪漢臣者尋奉特旨免議而余國柱時爲大學士以斌當九卿會議時有慚對董漢臣之語傳旨詰問斌奏董漢臣以諭教爲言而臣忝長宮僚動違典禮負疚實多上以詞多含糊令再回奏斌言臣資性愚昧前奉綸音一時惶怖罔知所措本欲自陳愆過致語多牽混罪何可辭臣自念供奉以來並無正經善言足以仰助萬一而臣動違典禮循省自慙年來衰病侵尋愆過叢積乞賜嚴加處分以警溺職上因其遮飾具奏仍不明晰降旨嚴飭之左都御史瑯丹王鴻緒副都御史徐元珙鄭重等劾斌奉諭申飭不痛自引咎並追論其

於蘇州去任時巧飾文告沽名干譽會耿介以疾乞休詹事尹泰少詹事舒淑開  
晉布翁淑元劾介僥倖求去實無痼疾并劾斌妄薦如尸之人吏部尙書達哈塔  
疏言臣奉命輔導東宮數日之內負罪實多以湯斌耿介不能當其任况庸陋如  
臣乞准解退疏並下部察議斌介達哈塔俱應革職上命斌與達哈塔仍留任九  
月改工部尙書未幾疾作遣太醫診視十月卒年六十有一遺疏入遣大臣奠茶  
酒諭曰湯斌任巡撫時廉以自守特加擢用忽聞溘逝深軫朕懷命由驛還櫬下  
部議卹部臣以斌曾降七級回奏奉特旨仍如尙書例予祭葬後祀陝西江西江  
南名宦世宗憲皇帝雍正十年詔入賢良祠今上乾隆元年賜諡文正所著有洛  
學編潛菴語錄詩文諸集

陸隴其

陸隴其浙江平湖人康熙九年進士十四年授江南嘉定知縣十五年十二月巡  
撫慕天顏請行州縣煩簡更調之法因言嘉定及崑山丹陽金壇等縣政務甚煩  
賦多逋欠如隴其之操守稱絕一塵才幹實非肆應若調補稍簡之縣必勵其素  
守惠愛百姓疏下部議謂煩簡更調非例既無肆應之才應照才力不及例降三



級調用會縣民有被盜殺而其親屬以讐殺訴隴其詳報是讐是盜候緝獲後擬  
既而獲盜鞫實論如律總督阿席熙入奏部議隴其初報不直指爲盜應照諱盜  
例革職隴其遂罷歸十七年詔舉博學鴻儒工部主事吳源起薦隴其理學純深  
文行無愧得旨召試隴其赴京未及試丁父憂歸十八年左都御史魏象樞應詔  
舉清廉官疏言隴其任嘉定知縣清操飲冰愛民如子去官之日萬民遮道攀轅  
既去之後家家尸祝比於父母部議俟服滿日仍補知縣上曰陸隴其係保舉廉  
能之官如直隸清苑江南無錫等縣最稱煩難之區用之庶可展其才二十二年  
補直隸靈壽知縣二十三年六月直隸巡撫格爾古德疏言隴其潔己奉公實心  
任事革除火耗陋規務農重穀匪類斂跡履任未久而教化已洽輿情循例薦揚  
以備擢用疏下部議予紀錄時九卿奉旨公舉清廉官格爾古德以兗州知府張  
鵬翮與隴其並舉焉二十九年吏部以科道需人奉命九卿舉學問優長品行可  
用者九卿以隴其與清苑知縣邵嗣堯三河知縣彭鵬並舉得旨行取授隴其四  
川道監察御史十月疏言畿輔沿山州縣土瘠民貧荒多熟少自昔而然數年以  
來皇上加意撫綏禁止私派不惜蠲賑鳩鵠之民得苟延殘喘然以言乎家給人